

H.M. 114.

114





LAURISTON CASTLE
LIBRARY ACCESSION

THE
GREAT QUESTION ANSWERED,

OR,

FREAGRADH

NA

C E I S T E M O I R E,

Cìod a nì mi chum bhì tearuinte ?

'NA DHA EARRAINN.

A' CHEUD EARRANN.

Agus air dha an tabhairt amach, dubhairt e, a Mhaighstirean, cìod is coir dhomh a dheanamh chum gu teannar mi? Agus dubhairt iadsan, Cìod ans an Tighearn Iosa Crìosd, agus teannar thu." Gníomh. xvi. 30, 31.

IS muladach an sgeul, ach is fìor, gur lionmhor iad anns an dùthaich Chrìosdaidh so, a ta aineolach air slighe na slàinte. Is nì soilleir e nach 'eil cùram sam bith orra mu staid shiorruidh an anaìma; ceart mar nach biodh iad an cunthart dèrann, mar nach cluinneadh iad riamh iomradh air Slàinte, no mar nach b' e an gnothachs' e. Cha n e gur muinntir gun ghéire gun fhoghlum amhàin a ta gun chùram mu 'n clùis so; ach daoine tuigseach geurchuiseach ann an gnothaichibh an t saoghail, tha iad ann nithibh spioradaìl gun umhail gun aithne gun iul. Nam biodh iad aineolach gun chomas, bhiodh an leisgeul r' a ghabhail. Ach 's ann a tha iad " aineolach d' an deoin," ag radh 'n an cridhe ri Dia, " Imich uainn, oir cha n àill leinn eolas do shlighean." Job xxi. 14.

Ach tha fianuis air taobh an Tighearna ann an Cogais (a) gach duine. Cha n 'eil duine, cìod sam bith a deir e, nach 'eil fiosrach gur peacach e fein, an cunthart pean-

(a) Coinseas, Comhfhios.

A

ais, an eismeil maitheanais. Ge b' aineolach borb fear^m coimhead a' phrìosuìn ann am Philippi, a' sleuchdadh do iodholaibh riamh ò 'oige; gidheadh an uair a dh' aithnich se e fein ionann's an glacaibh an Euig, chriothnaich gach ball, agus dh' éigh e cobhair. Ma bha Geintileach borb anns a' chàs ud, is dòchadh gu bi an duine sin fuidh 'n fhaireachdainn cheudna, a fhuair altrum agus oileadh fuidh oideas (*b*) an t-Soisgeil. Duine bàsmhor, air lughad a chùram agus air doillead 'inntinn, fannaichidh a chridhe trath dh' aithnicheas e ceum trom a' bhàis teann air a thòir. Mar sin agus an t-anacreideach, air meud a chruadail agus cruais a chridhe, caillidh e, mar is trice, a mhisneach, 'nuair a chli e am Bàs a' teachd gun athadh 'n a chòdhail.

A leughadoir, feuch nach 'eil thusa air aon de 'n droing a ta gun chùram an anama, gun chuimhne air Dia, no air bàs, no air breitheamhnas, no air an t-Saoghal ri teachd. Feuch nach e fàth do smuairin, mar is ro thrice, siod a dh' itheas tu, agus a dh' òlas tu, agus a chuireas tu umad. Tha am Phillippach borb ud 'g ad dhètheadh; tha a' chainnt a labhair e, agus e fuidh amhlua^mdh inntinn, a' toirt fianuis 'n ad aghaidh.

Nam biodh tu *mar ainmhidhean an t-sleibh*, gun saothair gun mhathas, ach itheadh agus òl agus mireadh, car beagan bhliadhnachan, agus an sin dol fo 'n fhòid; bu cheart duit gach cùram a leigeil dhiot, ach cia mar zhoilicheadh tu do mhiann 's an àm. Ach cha n-ionann gnè do 'n duine agus do chreutoiribh eile. Ann ad phearsa tha bàsmhorachd agus neobhàsmhorachd, dulasach na talmhainn agus anail an Uilechumhachdaich, cocheangailte r' a chéile. Cha n 'eil 'n ad aimsir air talamh ach toiseach do reimheis, mar gu biodh tu snàmh thar caolas mata gu traigh na bibhuantachd. Tha thu a' togail thighean, a' combhachadh fearainn, a' beathachadh threud, agus a' deanamh d' àite-comhnuidh 'n a thuin-eachas buan; agus gidheadh cha tuineachas buan duit e. Tha do chridhe a' dlù-leantuinn ris na nithibh talnhaidh sin; ach cha chuibrionn iomchuidh dhuit iad. Is gearr gu ruig an t-àm anns nach faicear iad ni's mò. Ach ortsa cha tig crìoch. Chì do shùil an domhann ma

(a) Theagasg.

'n iadh grian a' dol 'n a smàl; ach mairidh tusa 'na dhéigh, agus seasaidh tu an làthair Màic an duine, aig a theachd chum breith. Nach féumail leat smuaineachadh gu toigheach air na nithibh sin; agus nach mithich a dheanamh?

Is creutoir neo bhàsmor thu, do 'n éigin freagairt do 'n Dia a chruthaich thu air son d' uile dheanadais. Tha do Chogais ag comhdachadh so ort, gach uair a dh' eisdeas tu rithe; ge bu bhuidhe leat, gu tric, i bhí 'n a tosd. Ach ged tha so mar a tha, gidheadh cha bhíodh adhbhar eagail mar bhíodh gu *do pheacaich thu an aghaidh do Chruithadair*. Cha n 'eil adhbhar eagail aig an di-chiontach roimh Cheartas Dé. Cha chuireadh mod no breitheamhnas fianh ort, nam biodh tu gun lochd. Ach tha thusa 'n ad pheacach, 'n ad ghéig chrìonaich o chrann truailidh. Bhuilich Dia, ann am fialachd a chridhe, na h-uile maith a dh' fheudar luaidh air a chreutoiribh; agus cha d' iarr e, 'n a eiric sin, ach an rùn agus an gràdh. Ach 's ann a dh' ioc sinne ole dha an eiric maith. Tha do Choguis a' toirt fianuis gur e sin a rinn thusa; gur dualach dhuit an t-ole, agus gu bheil do chridhe ag aomadh o Dhia.

Ach ged chanar peacadh riut, gidheadh nam b' e gu *do thuit thu anns a' pheacadh troimh chruaidh fhortan as eugmhais do choire*, dh' fheudadh tu earbsadh gu deanadh Dia uile-chothromach do theasairgin as a' chruaidh-chàs nach b' urrainn tha fein a sheachnadh. Ach cha'n-ann mar sin a ta a' clùis. Ged their thu gu d' thainig am peacadh asteach do 'n t-saoghal le Adhamh, agus ged shaoil thu gu gabh so do leithsgeuls'; gidheadh tha do Chogais a' toirt fianuis gur ann mar a ta thu is àill leat a bhith, agus gur e am peacadh do roghainn fein. Their thu gu do lean am peacadh riut o do shinnsiribh, agus nach e do choire fein e. Ach ma tha thu gun choire, c'uime bhios do Chogais 'g ad dhiteadh air son a' pheacaidh tuille na air son galair 's an fhcoil a leanadh riut o d'shinnsiribh? C'uime nach saor thu duin' eile o choire air an adhbhar cheudna, an uair a chiontaicheas e 'n ad aghaidh fein? Ma ni do choimhearsnach eucoir ort, cha ghabh thu a leisgeul air son gu d' rugadh e le droch chridhe 'n a chom, agus nach b' urrainn e a leasachadh. As do

bheil fein bheirear breth ort. Ma tha thu neo-chomasach air maith a dheanamh, 's ann a chionn gu bheil thu mi-dheonach. Cleas an t-seirbhisich neo-fhìreanaich: meallaidh e a mhaighstir, agus goididh e a chuid; agus their e nach 'eil comas aig air, gur e an droch chridhe a's coireach. Cha mheasadh tu an seirbhiseach ud neo-chiontach; ni mò a mheasas Dia thusa neochiontach. Cha n'eil thu gun chomas air ioma ni a's àill leat; ach tha thu neo-thogarach air ioma ni a tha 'n ad chomas. Is miannach leat eolas; ach cha n-iarr thu eolas air slighe an Tighearna. Is taitneach leat comhladar; ach is beag ort labhairt mu nithibh spioradail. Tha thu déidheil air naidheachd a chluinntinn; ach an sgeul a dh' aithris na h-aingle, agus a chuir Mac Dhe' an céill, cha n e do thlachd bhi 'g a éisdeachd. Is dearbh-shoilleir le sin gur ann as a' mhi-thoil a dh' fhàs am mi-chomas.

Aris; ge nach b' urrainn thu ràdh gu bheil thu saor o choire; gidheadh *mur biodh anns a' pheacadh ach ni suarach*, nach b' fhiach e a gheur-rannsachadh no gu b' fhubas a dhioladh le h-aithreachas, le deuraibh, no le h-urnuigh; 's ann bu lugha d'adhbhar eagail. Ach 's fhada nach ann mar sin a tha a' chùis. Nam biodh am peacadh 'n a ni co suarach ann am beachd an Tighearna 's a ta e ann am barail dhaoine, cionnas a labhradh esan mallachdan co uamhasach 'n a aghaidh? Am mallaicheadh e a chreutoirean 'n am bascaid agus 'n an stòr, 'n an luidhe agus 'n an éiridh, 'n an dol amach agus 'n an teachd asteach, 'n an cuid agus 'n am pearsa, 'n an corp agus 'n an anam, air son ni co suarach as nach b' fhiu e ainmeachadh? Nam bu ni eatrom faoin am peacadh, an dìteadh Athair na tròcair an cinneadh daonna uile air a shon, 'g an cur fuidh gach truaighe anns a' bheatha so, fuidh 'n bhàs aimsireil, spioradail, agus siorruidh? Gu h-àraidh, cionnas a b' éigin gu fuillgeadh Mac Dhe ann ar nadur, mar iobairt réitich, mus am biodh am peacadh air a dhioladh?

Ach ma tha am peacadh co ghràincil do 'n Tighearna, nach eagalach do chor, O pheacair? Ged shruthadh do shùil a là agus a dh' oidhche; ged bheireadh tu an saoghal nam bu leat e; seadh, ged bheireadh tu toradh do chuirp an eiric d' anama; cha bu leor e g' ad fhuasgladh. Ged bhiodh d'aithreachas treibhdhireach, agus d'unhlachd iomlan anns na tha romhad, cha dioladh sin

air son do chionta anns na chaidh seachad. Ged is aithreach leat gu d'thug thu fiachan ort fein, agus ged nach cuireadh tu tuille riu; cha deanadh sin an dioladh, no an lughdachadh. Nan rachadh bean phòsda air seacharan le striopachas, ciod a' chiata ghabhadh a fear dhì, ged thigeadh i, an deigh a glacadh, ag iarraidh réite; agus cinnte aigesan gu bheil a rùn 's a togradh fathast a dh'ionnsuidh a leannain?—Ach co aca dh' aithrich no nach d'aithrich thu e, is cinnteach gur *peacach cailte* thu. Feudaidh daoine barail a thoirt air a' pheacadh réir a thoraidh an leth amuigh; ach tha Dia sealltuinn air a' chridhe an leth astigh. Cha chonaich iadsan ach na lochdan a ni dochann do dhaoinibh 'n am pearsa, 'n an cliu, 's 'n am maoin; ach amhaircidh Dia air uile ghràinealachd a' pheacaidh, agus gach toradh searbh a chinneas as nis agus aris. “Tuig uime sin agus faic, gur olc agus searbh an ni gu do thréig thu an Tighearn do Dhia, agus nach 'eil m' eagalsa annad, deir an Tighearn Dia nan sluagh.” Jerem ii. 19.

Ged tha am peacadh 'n a ni ro ghràineil an sealladh do Chruthadair, agus ged nach 'eil e an comas duitse a dhìoladh; gidheadh nam b'urrainn thu seasamh roimh chumbachd an Tighearna, nam b'urrainn thu dol as o làimh, no nam b'urrainn thu a chorruidh a ghiulan; cha bhiodh do mhi-chùram 'n a chùis iongantais co mhòr. Ach cha saoil thu fein gur urrainn thu *seasamh roimh neart an Uilechumbachdaich*. 'Nam suidhe ri cuirm is pòit, maille ri cuideachd gun umhail mar thu fein, bidh tu treun 'n adhochas, labhraidh tu gu h-naibhreach, agus maoidhidh tu gu dàna; ach cha n 'eil do bhriathran ach faoin. Ma bheanas Dia riut le 'làimh, dh' fhalbh do threoir, thréig do mhisneach thu gu tur; agus an dùraig thu an Tì uilechumbachdach so a bhrosnachadh 'n ad aghaidh? “Ma ruith thu leis na coisichibh, agus gu do sgèthich iad thu; cionnas a ni thu strì ris na h-eachaibh? Jerem. xii. 5.—Co bheag as sin is urrainn thu *dol as o 'laimh*. Cia an taobh gus an teich thu? Nam freagrach na creagan do ghuidhe, agus na beanntan d' achuinge, agus gu tuiteadh iad air do cheann, is beag a dheanadh iad d'fhòlachadh o ghnuis an Tì a ta 'n a shuidhe air a' Chathair, agus o fheirg an Uain. Romhad faraon agus 'n ad dheigh,

chuairt'ich Dia thu, agus leag e a làmh ort air gach taobh ; agus c'ait na seadh an teich thu as a shealladh ? Nan rachadh tu suas air Neamh, an sin choinnicheadh e thu gu do ruagadh air d'ais ; nan deanadh tu do leabaidh ann ifrinn, an sin dheanadh a dhioghaltas greim ort.

'Si an aon cheist eile, *An urrain thu corruich an Uile-chumhachdaich a ghiulan ?* Ach an saoil thu gur furas duit sin a dheanamh ? 'Nuair a chluinnear peacaich dhàna bhorba ri *damnaig*, agus ag guidhe mhallachdan air an corp 's air an anam ; shaoileamaid gu bu ni eatrom leo fearg an Tighearna, agus nach b' eagal doibh a ghiulan ; mar gu biodh iad air deanamh cumhnant sìth ris a' Bhàs, agus comhcheangal réite ri h-Ifrionn. Ach an uair a thuirlingeas an Tighearn chum breith, agus chum dioghaltas a dheanamh air a mhuinntir nach do ghabh eolas air, agus nach robh umhal do 'n t-Soisgeul, co a sheasas ann là mòr agus uamhasach sin an Tighearna ? An bi do làmh an làidir, no an bi do chridhe fulachdach, 's an là anns am buin Dia riut a réir do ghnìomhara ?

O leughadoir, co sam bith thu, smuainich air *an fheirg a ta ri teachd*. Nam bu bheart eucorach a dheantadh ort, is ann a b' fhusadh dhuit a ghiulan. Ach ma 's dòrainn is cuidhrionn duit, bidh do Choguis gu siorruidh ag ràdh *amen* ri binn a' Cheartais a rinn do dhìteadh. Agus nam b'e amhàin Ceartas Dé a bhiodh 'g ad dhìteadh, 's ann a b'eatruime d' thulangas na 'nuair a bhios a Thrò-cair cuideachd, air an d' rinn thu tàir, ag eigheach dioghaltais a' d' aghaidh. Ma 's ann gu dòrainn a théid thu, c'ait am bi do chrannchur ach maille ri Corasin agus Betsaida ? 'Se Maitheas a chuireas cruaidh agus faobhar air claidheamh a' Cheartais. 'Si corruich an duine chiuin chacin is miosa na corruich an duine bhuirb ainiochdmhoir. Is i " fearg an Uain " is uamhasaiche na boile an Leomhainn.

Tairéis duit na nithe sin a chluinntinn air an cur an céill gu soilleir, uair agus uair ; mar do bhean iad ri do chridhe, tha adhbhar eagail gu bheil Dia 'g ad thoirt thairis gu cruas cridhe, agus gu bheil e ag labhairt umad ann am briathraibh an Fhàidh, " Imich chum a phobuill so, agus abair, Le cluinntinn cluinnidh sibh, agus cha

tuig sibh ; agus le faicinn chi sibh, agus cha n aithnich sibh. Oir ta cridhe a' phobuil so air fàs reamhar, agus tha iad ag cluinntinn gu trom le 'n cluasaibh, agus chaog iad an sùilleann ; air eagal gu faiceadh iad le 'n Sùilibh, agus gu cluinneadh iad le 'n cluasaibh, agus gu tuigeadh iad le 'n cridhe, agus gu pilleadh iad, agus gu slànuich-inns' iad." Gnio. xxxviii. 26, 27. Anns an t-sean aimsir, an uair a bheannaich Dia a phobull Israel le pailteas de nithibh aimsireil, smachdaich e an seach-rana le peanas trom aimsireil ; agus nise gu do bhuilich e air daoineibh pailteas de shochairibh spioradail, smachdaichidh e an easaontas le breitheanasaidh troma spioradail.

Ach gun fhios nach deonaich an Tighearn duit fathast cridhe chum eisdeachd, cuiridh mis' an céill duit slighe na slàinte, agus gun slighe ann ach a h-aon. Am focal a thainig a dh' ionnsuidh fear coimhead a' phriosuin ann am Philippi, thainig am focal ceudna thugads' an diu ; "oir is ann mar sin a ghradhaich Dia an saoghal, gu d' thug e aon-ghin mhic fein, chum cia b' e neach a chreideas ann, nach sgriosar e, ach gu bi a' bheatha shiorruidh aige." Eoin iii. 16. Chuir e a Mhac, cha n ann ambàin g' ar seoladh anns an t-slighe dhìrich cheirt, ach gu biodh e 'n a iobairt réitich air son a' pheacaidh. Mar sin dh' fhuiling e fuidh làimh dhaoine mirunach ; ach a thuille air sin, b'i toil an Tighearna a bhruthadh ; chuir e fuidh amhghar e, agus rinn e 'anam 'n a iobairt air son peacaidh. Isai. liii. 10. Dh' àithn e d'a chlaidheamh dùsgadh 'n a aghaidh ; chum trid a bhàis-san gu nochdadh e tròcair do pheacaichibh cailte. Dh' agair e airsan ar peacaidhne, agus le sin thaisbein e a cheartas, chum gu biodh e cothromach an uair a dh' fhireanaicheas e an duin' a chreideas ann an Iosa. 'Si so an aon iobairt a tha taitneach do Dhia. Cha robh brìgh ann am fuil tharbh no ghabhar, ach mar a bha iad 'n an samhladh air an iobairt mhòir iomlain so. Cha n èisd Dia ri moladh no buidheachas no urnuigh o bheul peacaich, ach trid fearta na h-iobairt so. Cha tig e dhuitse, creutoir truailidh ciontach, a shaoilsin gu feud thu ceart chorruidh an Tighearna thionndadh air falbh, no deadh-ghean do Shlanuighir a chosnadh, le do dheanadas fein. Ach 's e bhuinneadh dhuit gach dòchas sam bith eile a leigeil dhiot, ag-

us do thaice leigeil ris an làn dioladh a thug Criost do 'n Lagh air son dhaoine peacach. Tha cuireadh laidir agad teachd a dh' ionnsuidh Criost, ceart mar a ta thu. "Rinneadh esan 'n a iobairt pheacaidh air ar son, ged nach b'aitbne dha peacadh, chum gu biomaid air ar deanamh 'n ar fireantachd Dhé tridsan." Thug Dia d' a sheirbhisich frithealadh na réite ; agus tha iadsan 'n an teachdairibh air son Criost, mar gu cuireadh Dia impidh leo-san, tha iad ag guidheadh ort, as uchd Criost, bhí réidh ri Dia, 2 Cor. v. 20.

Tha sochairean an t-Soisgeil, maitheanas agus réite, sìth agus sláinte, air an samhluhadh ri cuimh bainnse a dheasaich Rìgh an domhainn air son a Mhic. Chuir e a theachdairean amach gus na ròidibh mòra agus na gàrach-aibh, chum gach aon, co sam bith e, a ghairm, seadh an comh-éigneachadh gu teachd asteach. Ach a thuille air so, tha an Tì Uilechumhachdach ag earail agus ag àithneadh dhuit, mur àill leat dol fuidh dhòrainn shiorruidh, gabhail ri Iosa Criost mar a ta e air a thairgseadh dhuit anns an t-Soisgeul. Ma bhriseas tu an Lagh, dìtear thu leis an Lagh ; ach ma dhiùltas tu Criost, agus gu buanaich thu mar sin, tachairidh dhuit mar a thachair do 'n chrann fhige, tuitidh mallachd an Fhir-saoraidh fein air do cheann, agus gun fhear-saoraidh eile ann gu d' theas-airgin.

Na h-abair annad fein, Na nithe sin uile chreid mi o m'òige. Maith dh' fheudtadh gu cual thu iad, agus gu d' fhoghlum thu iad o d' shinnsiribh. Ach cha n-ionann sin agus an creidsinn. Shaoil na h-Iudhaich gu do chreid iad Maois, ach chomhdaich Criost orra gu robh iad meallta ; "Nan creideadh sibh Maois, ars' esan, " chreideadh sibh mise, oir scriobh e mu m' thimchioll." Nàraichidh creideamh nan deamhan do chreideamh-sa ; tha iadsan ag creidsinn agus tha iad ag crithneachadh ; tha thusa, ma 's fìor, ag creidsinn, agus tha thu gu samhach socrach ag gabhail gu fois. Cha chreideamh do chreideamh ; cha n'èil ann ach creideamh marbh. Nan creideadh tu do rìreadh an Soisgeul, leigeadh tu dhìot do dhòchas ann ad ghliocas agus d' fhìreantachd fein ; chuireadh tu do thoil fein air chùl ; dh'earbadh tu d'anam ri saor throcair Dhé, tre thoillteanas agus feartaibh na fo-

la a dhòirteadh air a chrann-cheusaidh ; agus leanadh tu Crìost gu deonach togarach, tre urram agus easurram, tre mhi-chliu agus dheadh chliu. Mar creid thu deadh iomradh an t-Soisgeil, ionnas gu bean e ri do chridhe, gu dùisg e d'aighe, agus gu cuir e d'inntinn fuidh ghluasad, is cca ma cìod an creideas a bheir thu dha. Cha n'eil do chreideamh ach " marbh, agus e leis fen ;" Seum. ii. 17. cha n'eil cuid no cuidhrionn agad anns an t-saorsainn a dh' oibrich Crìost : tha mallachd Dhé ullamh gu tuit-eam air do cheann.

Ma chuireas tu fathast an suarachas cuireadh an t-Soisgeil ; ma 's roghnaiche leat do threabhachas, no do cheannachd, no ni sam bith eile ; chi thu nach 'eil cuidhrionn agad maille ri muinntir shaorta an Tighearna. Gidheadh biodh fhios agad nach fàgar tigh na cuirme falamb ; cha bhi rioghachd Neimhe gun luchd-seilbhe ; cha bhi Crìost gun duais a shaothaire, co aca thearnar no chaillear thusa. A' chlach a dhiùltadh le daoineibh, 's i fathast clach-chinn na h-oisinn i. Thoir fairear ma seadh, gabh comhairle, agus abair cìod i do bharaile mu'n chùis.



AN DARA EARRANN.

NAN cuireadh neach a' cheist anns a' cheann-teagaisg air an duin' a's géire air talamh, gun eolas an t-Seisgeil aige, cha b'aitlne dha a fuasgladh. Nan cuirteadh a' cheist cheudna air na daoineibh gllice foghlumte am measg nan cinneach no nan Iudach, anns na linnibh a dh' fhalbh, cha b' urrainn aon duine dhiubh freagradh thoirt anns am biodh seadh. Agus ri ar linn fein, cha n fhaighear aon anacreideach, air meud 'eolais agus air feabhas a gheurchuis, a b' urradh freagradh iomchuidh a thabhairt air a' cheist so. Gidheadh is ceist i a thig ann aire gach neach, mar a shaoileamaid, uairegin ; agus is éigin a fuasgladh, neo bhi cailte gu siorruidh.

A leughadoir, feudaidh e bith gu do smuainich thusa cheana air a' cheist mhòir so. Math dh' fheudtadh gu cual thu searmon gheur, no focal brioghor o bheul caraid, no gu d'rinn am bàs briseadh air do theaghlach, no gu do

bhuail làmh an Tighearna do phearsa, no do chuid ; theagmh gu d' rinn nì éigin dhiubh sin do dhusgadh. Cha n'èil do thlachd nise mar b'abhaisit ann an comhladar agus gnothuichibh an t-saoghail ; agus cha mhò na sin tha do thlachd ann an cochomunn an Tighearna. Leig thu dhiot cuid de do dhroch chleachdaibh, agus ghnàthaich thu cuid de dhleasanasaibh na diadhaidhachd ; ach cha d'fhuair thu fathast sìth do d'anam. Is cràiteach leat sealltainn 'n ad dhéigh ; is fuathasach leat sealltainn romhad. Gach uair a smuainicheas tu air an Dia tha os do cheann, fàgaidh sin thu fo bhuaireas. Is i do chainnt air uairibh, Mo thruaighe gu d' rugadh mi riamh ; mò thruaighe nach cnuimheag mi anns an ùir ; b'fhearr dhomh bhì marbh na ann. Ach is maith tha fios agad gur faoin do dhùrachd. Is duine thu ; is duine beo thu ; cha n-urrainn thu pillinn gu neo nì ; ach is duine bàsmhor thu ; is éigin dol air d' aghaidh, agus seasamh an lathair an Tighearna Dia uile-naoinh agus uile-chumhachdaich.

Ma tha leithid so de smuaintibh ag éirigh gu tric ann ad inntinn, is ionann ceist maoir a' phrìosuinn agus a' cheist a tha do chridhe-sa a' feoraich, “ Ciod a nì nì gu bhì tearuinte ? ” Tha freagradh an Abstoil agad. Bheiream's oidhrip air focal no dhà a ràdh riut mar fhosgladh air an fhreagradh sin.

Ma tha thu a' feoraich ciod a nì thu chum corruich an Tighearna thionndadh air falbh, agus thu fein a thaisbean mar neach a ta airidh air tròcair ; ciod an deadh obair a nì thu, chum gu faigh thu còir air slàinte mar dhuais do shaothaire ; am bheil nì sam bith mar sin a dh' fheadas tu dheanamh ? Cha n'èil aon nì. Is fìor gu bheil còir air slàinte r' a faotain, agus 'n a lorg sin a bheatha shiorruidh, mar *dhuais* ; ach cha n-ann mar *luach-saothaire* air son aon nì a rinn sinne, no a's urradh sin a dheanamh, leinn fein no le coghnadh Dhia ; 's e th' ann duais na h-umhlachd a thug Crìost do thoil 'Athar eadhon gu bàs. Is ann o shaor *ghean-maith* an Tighearna gheibh sinne duais, agus is ann mar sin is eigin a gabhail. “ Dhasan a nì obair, cha n-ann mar *ghean-maith* a mheasar an duais, ach mar fhìachaibh. Ach do 'n ti nach dean obair, ach a ta creidsinn anns an ti a dh' fhireanaicheas an duine mi-dhiadhaidh, measar a chreideamh mar fhìrean-

tachd." Rom. iv. 4, 5. Esan a dh' iarras cairdeas Dé a chosnadh le 'obair fein, tha e saoilsin gu faigh e a' bheatha mhaireannach mar thuarasdal, no mar dhuais a shaothaire ; ach esan a chreideas, tha e gabhail na duaise mar shaor ghean-maith gun a cosnadh. Thoir an aire gur e so cor inntinn gus an eigin duitse teachd, neo bàs-aichidh tu gu siorruidh. Am fad's a shaoileas tu, le ni sam bith a dheanamb, gu faigh thu maitheanas agus slàinte air sgàth na rinn thu ; tha thu le sin a' treigsin na h-aon slighe a dh' orduich Dia chum do thearnadh, agus gu cinnteach bithidh do chuidhrionn agad maille ris na h-anacraidich.

A leughadair ionmhuin, ceadaich dhomb labhairt riut le saorsainn. Is cunthartach an cor anns am bheil thu. Tha oighreachd shiorruidh, mar gu biodh fearann Chanain, fa d' chomhair ; agus mar teid thu asteach a ghabhail seilbhe oirre, is e do mhi chreideamh a's coireach. Chuala tu cia am freagradh a fhuair maor a' phriosuin ; agus cha n-fheudar caochladh freagraidh thabhairt duitse. Thoir an aire ma ta, mur dùraigeadh tu d'anam neo bhàsmhor a chall, nach cuir thu do dhùil ann ni sam bith ach ann an gràs Dhe 's an t-Soisgeul : " Creid anns an 'Tigh-earna Iosa Criost, agus bithidh tu air do thearnadh."

Ach eisd, an tùs, ri teachdaireachd an t-Soisgeil a th' agad r' a chreidsinn. Ma thuigeas tu e gu ceart, agus ma ghabhas tu ris mar ni ionchuidh agus freagarach, le d' uile chridhe agus le d'uil' anam ; ma thaitneas e ri do thogradh, mar is cinnte gu freagair e ri d'fheum ; tha a' chùis gu maith, agus eirigh gu maith dhuit a choidh. Cha chuir mi romlad barail dhaoine mu 'n t-Soisgeul, ach aithriseam briathra Ughdair an t-Soisgeil fein. Tha brìgh an t-Soisgeil air a chur sìos gu h-athghearr ann iomad earrann de 'n Tiomna nuadh, air doigh co reidh shoilleir, as gu feud fear 'n a ruith a leughadh. Mar so deir an Scrioptur : " Is ann mar sin a ghradhaich Dia an saoghal, gu d'thug e 'aon-ghin Mhic fein, chum cia b'e neach a chreideas ann, nach sgriosar e, ach gu bi a' bheatha shiorruidh aige." Eoin, iii. 16. " Is fìor an radh so, ('s ann a ta e co fhìor agus co chudthromach as gu d'fhàs e mar ghnathfhocal Criostuidh,) agus is fiù e air gach aon chor gabhail ris, gu d' thainig Iosa Criost do



'n t-saoghal a thearnadh pheacach." 1 Tim. i. 15. "Tha sinn a' searmonachadh Chrìost air a cheusadh." 1 Corin. i. 23. "Is i so an fhianuis, gu d'thug Dia dhuinn beatha mhaireanach; agus tha a' bheatha so 'n a Mhac." 1 Eoin, v. 11.

Ann a' leithid so de bhriathraibh athghearr tha an Soisgeul air a chur an ceill. Cha n e nach 'eil tuille ann r'a chreidsinn; ach gu bheil an teagasg a ta foillseachadh bàis Chrìost air a' chrann a' tabhairt leis, 'n a choimeachd, gach teagasg feumail eile; ionnas, ma ghabhas tu ri so gu ceart, gu creid thu a' chuid eile mar an ceudna.

Faic nis cìod a tha teachdaireachd an t-Soisgeil ag cur an ceill; gur ann aig Dia tha a' chòir, gur sinne tha 's an eucoir; gu do chiontaich sinn gun leisgeil; agus le sin gu bheil sinn fuidh bhìnn a Cheartais, buailteach do dhòrainn shiorruidh; gur ann o shaor ghean-maith Dhe tha trocair r' a h earbsadh; gu b'fheumail gu riaraicheadh a Mhac ionmhuin fein an Lagh, le 'umhlachd agus 'fhulangas gu ruig am bàs, mus am feudtadh tròcair a nochdadh do'n chiontach; gu bheil Dia làn-toilichte leis an dioladh a thug Chrìost seachad; agus gu bheil e reidh dhà nis, gabhail ris gach aon pheacach a chreideas ann an Chrìost, agus maitheanas thoirt da 'n a uile lochdaibh, d' am meud agus d' an lionorachd, gun a cheartas no a naomhachd fein a chur air cùl.

Cìod a deir tu ris an teachdaireachd so? 'Tha làn dearbhadh gur sgeul fìor a tha mi 'g aithris. Bha e air a labhairt an tùs leis an Tighearn fein, agus dhaingnicheadh e dhuinne leo-san a chual e. Thug Dia fianuis leo ann an comharaibh agus iongantasaibh agus miorbhuilibh iomarcach. An urrainn thusa gabhail ris an teachdaireachd ud le làn toil? An urrainn thu slàinte shiorruidh d'anama earbsadh ri focal an Tighearna? No am bheil thu a' saoilsin nach 'eil do chionta co romhòr, no do chor co ro chunthartach, no thusa co neo-chomasach air thu fein a chobhair, as a tha focal na fìrinn ag innseadh dhuit? Am bheil thu faicinn do chionta toirt barrachd air cionta dhaoin' eile, ged nach leir do dhuine sin ach duit fein? No an deacair leat tròcair a ghabhail an riochd peacaich chailte? An uair a ta thu ag asluchadh tròcair, am bheil

thu 'g ad mheas fein mar neach a tha cheana fuidh bhinn, agus ullamh gu bhi air a ghrad-chur gu bàs? No an e dùrachd do chuidhe gu faigheadh tu beagan tuille ur-raim anns a' bhreth a bheirear ort, gu cuireadh am Breitheamh dealach eadar thusa agus luchd mi-bheus gràineil, chum gu faicteadh gu do shaoithrich thu fein, agus gu do bhuannaich thu beagan, ann obair do shlàinte, agus nach robh thu ann eismeil gu deanamh Crìost na h-uiread air do shon-sa as a rinn e air son pheacach eile? Tha saorsa dhaoine peacach trid Iosa Crìost 'n a ni taitneach do Dhia; am bheil so taitin riutsa? No am bheil thu 'g a dhiùtadh, agus ag iarraidh, mar bha Naaman (2 Rìgh, v. 11, 12.) seol eile chum do shlànuchadh? Tha an seol so a' làn-fhreagairt ri d' fheum; ach cha fhreagair e ri barail mhealltaich, no ri smuaintibh àrdanach, no ri miannaibh neoghan do ghnè. Feumaidh iad sia uile bhi air an leagadh sìos, air an saltairt, agus ionann's air an ceusadh gu bàs. An urrainn thusa d' aontadh chur ri so, ag radh " Amen, is fìor agus is ceart, agus is maith focal an Tighearna?"

Is maith 's aithne dhomh gur e an ni a's mo a bhios do leithidisa 'g iarraidh *fois inntinn*; agus cia b' e ni a gheallas duit fois, is math leat fios fhaghail air. Ma ghabhas tu ris an t-Soisgeul le fìor chreideamh agus muinghin, gheibh thu gu cinnteach fois uaith. " Is i so an t-slighe dhìreach chòir;" imich innte agus gheibh thu fois do d'anam; ach cha n-fhaigh thu fois fhìor bhuan air aon doigh eile. Is cunthartach dhuinne sòlas eile thairgseadh; is bàs duitse sòlas eile ghabhail. Sparram ort a-ris, mur dùraigeadh tu d' anam a chall gu sìorruidh, na gabh fois ann ni sam bith ach ann an Crìost ambhain. Dùineam an earail so le rabhadh thoirt duit a thaobh cuid de na mearachdaibh anns an dòcha dhuit tuiteam.

1. " Na bi a' sìr-amharc air do chionta le ea-dòchas mi chreideach, agns le sin a' druideadh do chùil air trò-cair Dhe anns an t-Soisgeul." Na h-abair, Tha mo lochdan co mhòr agus co lionor, tha mo chionta co throm agus uamhasach, nach feudar leam maitheanas earbsadh. C'uime theireadh tu sin, agus gu bheil fuil Chrìost ag glanadh gach uile pheacaidh air falbh. Am bheil thu do ràradh creidsinn so? Cha n'eil cumhangachd ann

an Criost, ach ann ad innibh fein. Cha n'eil smuainte Dhe mar do smuainte-sa, no a shlighean mar do shlighean-sa : mar tha na neamhan àrd os an talamh, tha a smuaintean àrd os ceann do smuainte-sa. Am peacach a philleas ri Dia, gheibh e tròcair *gu pailte* Cha b'e sud am focal ceart, "Ma 's urrainn thu ni sam bith a dheanamh, dean trocair orm;" ach is e so e, "Ma 's urrainn thusa creidsinn, tha gach aon ni comasach dha-san a chreideas." Ciod e a ta thu cur an amharus? An e cumhachd agus foghainteachd do Shlanuighir? Nach 'eil e comasach air tearnadh *gus a' chuid a's fhaide?* Eabh. vii. 25. An e a thoil? Nach 'eil a chuireadh gràs-mhor a' dearbhadh dhuit cia toileach a ta e? An toireadh e gairm "Cia b'e air am bheil tart, thigeadh e do m' ionnsuidhs, agus òladh e," mar biodh e lan-toileach air miann gach neach a thig a shàsachadh? Math dh' fheudtadh gu saoil thu gur deadh chomhar air irioslachd agus aithreachas a bhi sìr amharc air do chionta le geilt agus mi-mhisnich. Is iomchuidh dhuit amharc air do chionta le trom-dhoilghios, ach seall nach e spiorad na fein-fhireantachd a tha 'g ad chumail gun sòlas. Nan dùraigeadh tu dol a dh' ionnsuidh Christ a dh' fhaghail tròcair, mar cheann-feadhna nam peacach, rachadh tu ann gu luath, agus gheibheadh tu saorsainn air ball. Ge lag do dhòchas, agus ge pailt do dheoir, is cunthartach leam gur e so a 's adhbhar orra, a chionn gu bheil thu an geall air deadh-ghean an Tighearna a chosnadh le maith eigin annad fein. Nan cuireadh tu cainnt air do smuaintibh, 's ann a theireadh tu, "Nam biodh ni eigin agam, air a lughad, a thaitneadh ri mo Sblanuighear, 's ann bu mhòid mo mhisneach a' dol 'n a fhianuis; nam biodh beagan feabhais orm, is ann bu dòchadh leam gu nochdadh e tròcair do m' anam." Cleas an duine thinn a theireadh "Nam bithinn beagan ni b' fhèarr, rachainn le tuille misnich a dh' iarraidh leighis." Nach e so fath mu 'n do ghearan ar Tighearn, "Cha 'nàill leibh teachd a m' ionnsuidhs' chum gu faigh sibh beatha." Am fad's a ta thu mar sin an geall air ni eigin a dheanamh a dh' fheadas do mholadh ann sealladh an Tighearna, 's ann a tha thu 'g iarraidh "d' fhireantachd fein a chur

air bonn.” Agus ma mhaireas tu anns an aigne sin, tha cunthart gu toirear thairis⁹thu gus a shaoilsin gu d' fhuair thu mu dheireadh annad fein am maith a bha d'anam a' miannachadh.

2. Ma tha do Choguis air dùsgadh agus 'g ad chronachadh, ionnas gu do leig thu dhìot cuid de do dhroch dheanadas, agus gu do leasaich thu cuid de do bheusaibh ; ' thoir an aire nach bi thu 'g ad bhreugadh fein le deadh dhòchas a thaobh do staid, o leasachadh do bheus an taobh amuigh.” Is mearachd so leis am bheil iomadh neach a' teachd gearr air fìor chreideamh agus air fìor shòlas. Abair gu do theich thu, roimh achmhasan do Choguis agus bagraibh an lagha, o lochdaibh càna chum dleasanasa na diadhachd, cha d' rinn sin ach na geugan a sgathadh ; dh' fhàgadh an crann slàn, agus an fhreumh beo, mar a bha. Cha n-e “ do pheacan a bhriseadh air falbh” a ni feum, mar brisear air falbh iad “ le fireantachd ;” Dan. iv. 27. agus cha deanar sin ach le creidsinn ann an Crìost. Tha duine làidir a' pheacaidh 'g a dhaingneachadh fein taobh stigh a' chaisteil ; agus mur gabh thusa dìon fuidh fhìor sgàil an t-Soisgeil, brisidh e mach ort le ùrachadh neirt, agus sguabaidh e roimhe gach leasachadh agus dleasanas faoin as an robh thusa gu h-amai-deil a' deanamh buin. Ged tha “ miann na feola” a' folachadh a' chinn, is dòchadh gu bheil “ miann na h-inntinn,” gu h-araidh uabhar spioradail, a' togail a' chinn gu h-àrd. Is cinnte gu bheil a' chùis mar so, ma 's e gu bheil thu a' leigeil do dhòchais air do leasachadh beatha, agus a' tarruing sòlais as sin ; agus an àite dhuit bhì ni's fearr, no nì 's faigse do Rìoghachd Neimhe, na bha thu roimhe. tha d'anam nì 's gràineile ann sealladh Dhe na bha e idir ; seadh, is dòchadh gu teid cis-mhaoir agus striopaichean asteach do Rìoghachd Dhe na thusa. Am fad's nach gabh thu rì Crìost, ceart mar a ta e air a thairgseadh anns an t-Soisgeul, cha ghabh Dia riutsa ; agus an gabh e riut fein, cha ghabh e ri aon obair no tabhartas a bheir thu d'a ionnsuidh. Dh' fhàg do pheacadh thu fuidh fheirg Dhe agus fuidh bhìnn a cheartais ; agus an bi an reite air a deanamh, cha ghabh e tabhartas o d' làimh. Cha tigeadh e ri onoir agus mòrachd an àrd-Rìgh tabhartas a ghabhail o do leithid.

3. “Thoir an aire nach gabh thu sòlas o thriobloid inntinn, no o gheur fhaireachdainn sam bith a bha agad” Feudaidh e bith gu-n abair cuid eigin riut, gu bheil do thriobloid na comhar cinnteach gu bheil tròcair a’ feitheamh ort; agus ma bhunaicteas tu mar a ta thu, a’ feitheamh mar gu b’ ann aig bruaich na linne, gu-n eirich gu moith dhuit mu dheire. Ach cha n fhiach a leithid sin a chreidsinn; cha n’eil bonn aig anns an Scriptor. Cha n e do thriobloid a dhearbhas gu d’ fhuair no gu faigh thu tròcair, ach toradh na triobloid. Dh’ fhulang Saul amhghar ’n a inntim co mhath ri Peadar. An nair a bha luchd-mortadh Iosa air an bicradh ’n an cridhe, cha tug Peadar sòlas doibh le innseadh gu bu dheadh chomhar sud air an iompachadh agus an tearnadh; ach dh’earail e orra aithreachas a ghabhail. agus bhi air ara baisteadh, ann ainm Iosa Crìost, chum maithheanais pheacaidh. Gnìomh ii. 8. Mar sin rinn Pòl agus Silas, an uair a bhuail uambann fear-coimhead a’ phriosuin. Cha tug iad misneach dha o ’n eagal a dh’ fhairich e; ach shearmonaich iad dha Iosa Crìost mar an t-aon bhun-dòchais. ‘Nam marbhadh Israeleach duine gun fhios, bha baile dèidin ann chum gu teicheadh e an sin, mus an deanadh dìoghaltair na fola greim air. Nan stadadh e air an rathad, ag gabhail sòlais o ’n eagal a dh’ fhairich e roimh chlàidheamh an dìoghaltair, an deanadh sin a thearnadh? Mar sin cha n’eil tearuinteachd dhuitse gus an t-ir thu asteach do bhaile na dèidin, agus gu dean thu greim air an dòchas a chuireadh romhad anns an t-Soisgeul. Ma ghabhas tu sòlas o d’ amhghar, is cunntach nach ruig thu Crìost, agus le sin gu bi thu cailtè. Is iomadh iad a rinn so; agus an uair a shaoil iad gu robh iad aig oir na linne, a’ feitheamh ri gluasad an uisge, ’s air a bha iad ’g an socrachadh fein air bonn fàs, agus a’ toirt a’ chle air a’ ghuineamh. Cha n’eil bealach meadhonach eadar creideamh agus ma chreideamh. Agus na tha neach a’ cluaintinn an t-Soisgeil, agus gidheadh nach ’eil a’ leigeil a thàice ri Crìost ’na aonar air son dàinte; is cinnte gur ann a tha e cur a dhòchais, ma tha dòchas aige, an an feartaibh eigin leis fein. Cha n’eil mearachd ann a’ s mho a no so.

4. “Thoir an aire nach cuir thu do dhòchas ann do

Chreideamh, mar gu bu deadh ghnìomh e-a choisir duit duais o Dhia." Is fìor gu bheil thu deanamh gu maith 'n uair a ta thu creidsinn, agus gu bheil thu le sin a' toirt umhlachd do àithne Dhe. Ach ma shaoileas tu gu bheil so 'n a ghnè umhlachd ris an canar t-tribhdhireach, agus gu bheil Dia nise toileach air gabhail ri sin an àite umhlachd iomlain, agus thusa fhìreanachadh air sgàth na h-umhlachd sin; tha thu fathast ag iarraidh d' fhìreanachadh fein a chur air bonn, fuidh riochd creidimh an t-Soisgeil. Is i so àithne Dhe, gu creid sinn ann ainm a Mhic. Tha creidsinn 'n a ghnìomh umhlachd do Dhia. Gidheadh cha n-ann an riochd umhlachd a ni e ar fhìreanachadh; ach do bhrìgh gu bheil sinn le so ag gabhail Chrìost, agus air ar dlu-cheangal ris; oir is ann air a sgàth-san amhàin tha Dia reidh ruinn. Ma tha do dhùil ann Iosa Crìost amhàin air son slàinte, cha bhì mceis idir agad air smuaintibh d'inntinn no oibreachadh do chridhe fein; ach air obair an tì a thainig chum an t-saoghail a thearnadh pheacach.

Ma 's aill leat fois chinnteach bhuan do d'inntinn, na leag do dhòchas air aon nì annad fein; ach seall an taobh amuigh dhiot fein air Iosa Crìost mar a ta e air a thaisbeanadh dhuit anns an t-Soisgeul. Feudaidh tu dearbhadh fhaghail, an deigh làimhe, gu deachaidh tu thairis o bhàs gu beatha, leis a' ghràdh a th' agad do na braitribh, agus le comharaibh eile o'n Scrioptur; agus o'n uair a shocrucias tu thu fein air steidh an t-Soisgeil, feudaidh deadh dhòchas sòlasach bhì agad ris an t-slàinte a ghealladh 's an t-Soisgeul. Ach a' cheud saorsainn a gheibh d' anam leonta, ma 's saorsainn cheart i, thig i dìreach o Chrìost; an uair a chi thu, 'n a umhlachd agus 'n a fhulangas-san, a' cheart chobhair a fhreagras ri feum agus ri togradh duine pheacaich chaille mar thusa.

An deigh rabhadh thoirt duit mu na ceumaibh fiara bu chòir dhuit a sheachnadh, bheiream seol no dhà rau 'n t slighe dh'ìrich cheirt anns an còir dhuit imeachd.

'S e creidsin ann Iosa Crìost, esin a ghabhail mar a ta e air a thaisbeanadh anns an t-Soisgeul. 'S e Crìost an ceud thiodhlacadh bheir Dia seachad; maille ris-san bheir e gach nì maith eile. Ma bheir Dia dhuit Crìost an t-Soisgeul, agus an sin na h-uile nithe maith gu saor mail-

le ris; is eigin gu gabh thusa Criost an toiseach, agus an sin na h-uile nithe gu saor maille ris. Do reir so, deir an Scrioptur, "esan aig am bheil am Mac, ta beatha aige; ach esan aig nach'eil Mac Dhe, cha n'eil beatha aige." 1 Eoin, v. 12. Feumaidh tu a ghabhail mar a bha e air a thabhairt; 's e sin mar iobairt-reite air son a' pheacaidh; chum gu biodh Dia cothromach an uair a dh' fhireanaicheas e peacaich through aindiadhaidh a chreideas ann an Criost. Rom. iv. 5. Feumaidh tu d'earbsa chur ann san mar an t-aon bhun dòchais, agus maitheanas iarraidh as a leth-san amhàin. 'S i so an doigh air an eigin duit slàinte iarraidh; 's e so creideamh ann am fuil Iosa, leis am bheil peacaich air am fireanachadh. An uair a ghabhas tu Criost mar gu b'ann an ceangal-pòsaidh, gheibh thu còir is cuidhrionn anns na rinn agus na dh' fhulaing e air talamh, agus anns na tha e nis a' deanamh aig deas làimh Dhe air Neamh.

Ma chreideas tu ann an Criost, ged tha do thaice ris gu h-àraidh mar fhear-deanamh na reite eadar Dia agus d'anam; gidheadh an uair a ghabhas tu e mar do Shagart agus d'eadarmheadhonair, gabhaidh tu e cuideachd mar do Rìgh agus d'uachdaran. An uair a thig thu d'a ionnsuidh, air do shàruchadh le cionta, chum gu faigh thu fois, gabhaidh tu mar an ceudna a chuing ort, agus foghlumaidh tu an inntinn chiuin iriosal a bha aige-san. Mat. ii. 29. Ged fhireanaichear thu le Creideamh amhàin, cha n-ann le Creideamh a ta leis fein, Seum. ii. 17. ach Creideamh a ghineas umhlachd do gach uile àithne. 'Nuair a ghabhas tu ri Criost, agus a cheanglar thu ris tre Chreideamh, tha do Chreideamh an sin 'g ad fhìreanachadh; 'nuair a dh' aomas Creideamh thu gu umhlachd a thabhairt do lagh Dhe, tha do Chreideamh an sin 'g ad naomhachadh.

Air an doigh so, a leughadoir ionmhuin, gheibh thu fois do d' anam. Ann an gabhail na slighe tre fhàsach an t-saoghail so. dh' ionnsuidh tìr na glòire, bidh iomadh obair r'a deanamh, iomadh namhaid r'a cheannsachadh, agus theagamh iomadh cruachas r'a fhulang. Ach ma bhunaicheas tu ann an creidsinn, mar a thòisich thu, ionnas gu caith thu do bheatha reir creidimh, gheibh thu neart a reir d'fheuma. Fàsaidh gach dleasanais ni 's tait-

niche, tàsaidh gach buaireadh ni 's laige, ceannsaichear do naimhdean romhad, agus bidh fulangais na beatha so ag oibreachadh cudthrom glòire dhuit, a mhealas tu gun tàmh, gun chrìch, gun lughdachadh, anns an t-saoghal a ta ri teachd.

Beannachd an Tighearna leat; is gu ma slàn gu bràth do d'anam, tre ' ghràs a ta ann Iosa Crìost.

DUNEIDIN ... CLODH-BHUAILTE LE EGIN RITCHIE.

1811.





